

Gill-Ordnung

1. Gill-Antog

De Gillbröder dreegt bi all Gill-Veranstalten den Gill-Antog, sowiet as se een hebbt. De Antog besteiht ut een swarte or düsterblau Bux, een grau Jack mit de Gill-Nodel, een witt Hemd mit'n Schönkirchen-Slipps, swart Schoh un den Gill-Hoot.

2. De Gillfierdaag

As dat in de Gill-Statuten fastlegt is, ward de Gillfierdaag in jedeen Johr an't Enn vun de letzt Week in Mai afholen. Dorbi schüllt twee vun de Festdaag in'n Mai liggen.

2.1 De Festkledaasch

De Gillswestern dreegt, sowiet as se een hebbt, de Schönkirchen-Festdracht, de Gillbröder, ok sowiet as se een hebbt, den Gill-Antog. De 1. Öllermann mit Gill-Keed, de annern Lüüd ut Vörstand un Achmannschaff dreegt dorto ehr Funktionsafteken. De König hett, wenn he afholt ward, bi de Festumtöög un bi dat Begröten op'n Kommers un ok bi't Gillfröhstück de groote Königskeed üm, dar achteran de lütte Königskeed. De Königin driggt de Königinnenkeed un ok, wenn de König de groote Königskeed anlegt het, de Kroon, de Vice-König de Ehrenkeed un de Königinnen un Königen ut de Vörjohrn ehrn Königsorden.

2.2 De Gill-Fohnen

För den Festakt to'n Anfang vun de Gillfierdaag un bi'n Ümtoog mit uns befründte Gilln to'n Afholen vun uns Königspoor för dat Gillfröhstück ward all dree Fohnen in düsse Regenfolg dragen:

- a) Fohn vun de Ole Gill
- b) Fohn vun de Windgill
- c) Fohn vun de Knakenbruchgill

Ansünsten ward nur de Fohn vun de Ole Gill dragen.

3. De Königsball

As dat in de Gill-Statuten fastlegt is, givt de Ole Gill all Johrn to Ehrn vun dat Königspoor an letzt'n Sünnabend in Oktober een Königsball.

All Königspoor un de Vörjohrn marscheert, sowiet dat geht, tosamen mit uns Königspoor to'n Anbeginn vun den Festball op den Sool.

All Festgäst, ok de Gillswestern un Gillbröder, in festlich Kledaasch. De König driggt bit na dat Begröten mit den Ehrendanz de grote Königskeed, dar achteran de lütte Königskeed. De Königin driggt de Königinnenkeed un de Kroon, de Vice-König de Ehrenkeed un de Königinnen un Königen ut de Vörjohrn ehrn Königsorden.

4. Anner Gillveranstalten

Op all de annern Gillveranstalten, de as solch een ankündt weren so bispillswies uns Gillversammlung, uns plattdüütschen Abende, uns Klöhnsnackabende, uns Olen-Kaffee, uns Kaffeefohrt usw, avers ok op de Gemeenschaffsveranstalten mit uns befründten Gilln un de VHS un op de Inladen vun de Gemeen, vun uns befründte Gilln un Vereen dreegt de Gillbröder, sowiet as se een hebbt, den Gill-Antog. Dorto leegt de 1. Öllermann de Gill-Keed an, de König de lütte Königskeed, de Königin un ebenso de Königinnen un Königen ut de Vörjohn ehrn Königsorden. De Gillbröder ut Vörstand un Achmannschaff dreegt ehr Funktionsafteken. Düt gellt ok, wenn Gillswestern un Gillbröder uns Gill bi een offiziell Geburtsdagsfier or Jubiläum vertreden dod. Dorbi sünd uns Gillswestern, sowiet as se een hebbt, mit de Schönkirchen-Festdracht kleedt. Vörstandsbespreken, private Geburtsdagsfiern bi Gillbröder un Gillswestern tellt ni as offiziell Gill-veranstalten. Hier dreegt de Gillswestern un Gillbröder ehr normal Kleedaasch.

5. Ehren, Geburtsdaag un Jubilään

5.1 Ehren vun uns Gillswestern un Gillbröder

De Ole Gill ehrt, wenn een 25 John örnlich Gillswester or Gillbroder ween is, mit de sülvren Gillnodel un na 50 John mit de gollen Gillnodel. As dat in de Gill-Statuten fastleggt is, kann een op Andrag von'n Vörstand Ehren-Gillswester or Gillbroder warn, wenn de Gillversammlung tostimmt. Wenn een 50 John örnlich Gillswester or Gillbroder ween is, ward een dat automatisch dörch dat Utteken mit de gollen Gillnodel.

5.2 Geburtsdaag

De Ole Gill groleert ehr Gillswestern un Gillbröder to'n 70. Geburtsdag mit een Schönkirchen Chronik, to'n 75. un all nafolgende, graden Geburtsdaag mit een „5“ or „0“ an Enn mit een Präsentkorf

Een Delegation vun uns Gillswestern or Gillbröder bringt de goden Wünschen vun de Ole Gill in Afspraak mit de Angehörigen. De Gillswestern un Gillbröder sünd dorbi kleedt as dat in Regel 4 vun düsse Ordnung fastleggt is.

5.3 Jubilään

De Ole Gill groleert ehr Gillswestern un Gillbröder to gollen un diamanten Hochtied mit een Präsentkorf un Blomenstruß.

Op Inladen vun de Jubilaare bringt een Delegation vun uns Ole Gill de goden Wünschen.

Bi een Geschäftsjubiläum (aff 50 John) or Deenstjubiläum (aff 25 John) vun uns Gillschwestern or Gillbröder kümmt een Delgation vun uns Gill op Inladen.

De Lüüd vun düsse Delegationen sünd dorbi kleedt as dat in Regel 4 vun düsse Ordnung fastleggt is.

6. Truerfiern för uns Doden

As dat in de Gill-Statuten fastleggt is, ehrt de Ole Gill ehr Doden dordörch, dat se bi een Truerfier in Schönkirchen un, wenn sick dat moken lött, ok ut Dörp ruut mit een Fohn- un Kranzaforden deelnimmt. Wenn de Angehörigen dat wünschen doot, bemöht sick de Ole Gill, de Dregers för dat Bisetten to stelln.

Gillbröder dreegt bi de Truerfiern den Gill-Antog as dat in Regel 4 vun düsse Statuten beschreven is.

6.1 Truerfiern in de Marienkark vun Schönkirchen

De Gillbröder sammelt sick in de Ingangshall in'n Toorm un neemt - bit op de Fohnenafforden - den Gill-Hoot aff.

Inmarsch: Kranzdregers vör de Gill-Fohn, dorno de Sargdregers un achterrop de annern Gillbröder.

De Kranzdregers leggt den Kranz vör den Sarg, gedenkt dar een Ogenblick un gaht dann to ehrn Platz. Dann treedt de Fohnendregers vör den Sarg, dippt drie mal dörch Heben un Senken de Fohn as Gröten an den Doden un gaht dann to ehrn Platz. Nu gedenkt de annern Gillbröder an Sarg in de Regenfolg, so as se inmarscheert sünd und gaht dann to ehrn Platz. Nu eerst sett sick all Gillbröder dal.

Utmarsch ut de Kark: Toerst treedt de Dregers an den Sarg. Dann marscheert de Gillaforden - mit de Fohn vörut, dor achteran de Kranzdregers un Gillbröder - vör den Sarg ut de Kark.

6.2 Bisetten up'n Karkhof

So, as man ut de Kark rutkamen is, geiht dat ok to'n Karkhof. Op den Karkhof ankamen, stellt sick de Gillbröder in gebühren Abstand vun de Gruff op un de Dregers bringt den Sarg op de Gruff, um em dann gliexen aftosenken. De Dregers gedenkt noch een Ogenblick un stellt sick dann to te Gillbröder.

Na dat Utseegen vun den Doden dörch den Paster treedt een Kranzdreger an dat Graff, sprickt de Afscheedswöör för de Ole Gill un verbeugt sick vör de Truerfamilie. Nu treedt de Fohnendregers an't Graff, dippt drie mal dörch Heben un Senken de Fohn as letztes Gröten an den Doden un marscheert dann mit de Gilldelegation af. Na't Verlaten vun Karkhof ward de Fohn inrullt.

6.3 Överföhren na't Krematorium

Ward de Sarg na't Krematorium överföhrt, stellt sick de Gillaforden rechts neben den Liekenwogen.

Na dat Utseegen vun den Doden dörch den Paster geiht een Gillbroder an den Wogen, sprickt de Afscheedswöör för de Ole Gill un verbeugt sick vör de Truerfamilie. Nu treedt de Fohnendregers vör den Sarg un dippt drie mal dörch Heben un Senken de Fohn as letztes Gröten an den Doden.

6.4 Truerfiern in anner Karken

Bi een Truerfier in een anner Kark ut Dörp ruut ward de Ole Gill , wenn sick dat moken lött, in Afspraak mit de Familie mit een Fohn- un Kranzaforden vertreden. Ansünsten schickt de Ole Gill een Kranz.

6.5 Truerfiern in Krematorium

Bi een Truerfier in't kieler Krematorium ward de Ole Gill mit een Kranzaforden ohn Fohn vertreden.

Schönkirchen, **11.02.1996**